

coumporte quauque pèque, mes qu'a troubat amics à Loundres e à Paris qui l'an balhat las courreccioûs dous passadyes mau emprimats e, atau, qu'èm sègus d'abé lou « texte » sancè.

### L'Armanac de la Gascougnò.

Que bién d'espeli e debat la soue pelhe berde, qu'ey mey esmerit que yamey. Coundes, cansoûs, bères poesies, lous mièlhes felibres de Gascougnè e de Biarn que las an signades e, de segu, l'armanac de 1938 que sera passat per touts dab lou medich plasé que lous qui l'an dabanteyat.

Qu'ou troubarat en nouste emprimerie e, tabé, las liberères de las gares per 45 sos; si-u boulét per la poste, que calera manda 10 sos de mey. Ne-us regretarat pas. Poudé-s plase de loungs mouments per tant poc d'aryent, qu'ey cause prou reàle p'ou temps qui cour.

### Enço dous " Amics de la Léngue d'O ".

La balénte souciètat felibrénque de Paris, presidade p'ou mayourau Loubet, qu'a de nouvémbre ençà abiat lous sous parlaménts. Lou 3 d'aquet mes, Yan de Bouzet, daban ue numerose amassade de hilhs dou Meydie, que presentabe l'obre qui a escribude dab l'abat Th. Lalanne : *Du Latin au Gascon*; tau 10 dou mes mourt qu'aboun ue batalère de Mous de Mangin sus lou teàtre pouplàri en Gascougnè; lou 14 de yenè, lou president Loubet que debisara dous armanacs, e seguraméns se parle dou pay-boû dous armanacs *L'Armana prouvençau*, qui-n ey aus sous 84 ans, nou desbroumbara pas l'*Armanac de la Gascougnò* que hestéye lou sou quarantèri.

### La defunte espousicioû.

Que-s sab prou quines pénes aboun, lous de la Prouvince, coum e-ns apèren lous parisièns de Paris, dab û pot drin mespresous per cops, enta ha bale la loue idée d'esta representats à l'espousicioû de qui bién de barra lous pourtaus permè d'esta fenide. E Diu sap tabé tout ço qui n'an pas abut à subi lous prouvinciaus, û cop qui aboun fourçat l'entrade, de las parts d'aquets messius de la Direccioû; tant e tant que lou nouste amic Charles-Brun, hart de tout aco que demissiouna de president dou Coumitat. Or, si-n cau créde lous qui an seguit per mestié l'espousicioû, qu'ey lou plaça de las prouvincies, lou Centre Régional, qui abou lou mey de bisitous e doun las hèstes e manifestacioûs e soun estades las mey presades.

Boune leçoû taus capulats qui n'en boulèn pas entène à parla. Mes, entertan, n'ey pas la Prouvince qui retroubara lous milioûs qui a pounat enta l'espousicioû.

### Dòus.

Lou Douctou Dutauziet, de las Aygues de Sent-Louboué, gran amic de l'Escole Gastou-Febus, que bien de pèrde cop sus cop lous sous dus hilhs Robert e Henric, touts dus en bounes bies d'u bèt abiène.

Qu'auherim au praube pay en desòu l'amistat e lou soubeni dous sous counfrays de Febus.

L. R.